

## Kusanyikeni Msalabani

*Na huko mtakula mbele za Bwana, Mungu wenu, nanyi furahini katika yote mtakayotia mikono yenu, ninyi na wa nyumbani mwenu, aliyokubarikia Bwana, Mungu wako—*  
**Torati 12:7.**

**K**atika siku za zamani, Waisraeli walipokutanika katika mkutano wa dini, Mungu aliwaagiza hivi: “Na huko mtakula mbele za Bwana, Mungu wenu, nanyi furahini katika yote mtakayotia mikono yenu, ninyi na wa nyumbani mwenu, aliyokubarikia Bwana, Mungu wako.” Yote yatendwayo kwa kumtukuza Mungu yafaa kutendwa kwa furaha, na nyimbo za sifa, na shukrani, siyo kwa huzuni na moyo mzito.

Mungu wetu ndiye Baba mwenye huruma na rehema. Ibada Yake haipaswi kuangaliwa kama zoezi la majonzi na kuhuzunisha moyo. Imewapasa watu Wake kufurahia katika kumwabudu na kumtumikia. Yeye ambaye amewapatia watoto Wake wokovu mkuu, hataki wamtumikie kana kwamba ni msimamizi wa watumwa aliye mkali na asiye na huruma. Mungu ndiye rafiki yao aliye bora zaidi; na wanapomwabudu, anakusudia kuwa pamoja nao, kusudi awabariki na kuwafariji, akijaza mioyo yao furaha na upendo. Mungu anataka watoto Wake wapate faraja katika huduma Yake, tena wasione kazi Yake kuwa ni ngumu sana, bali wapate kupendezwa katika kumtumikia. Hata na wale wanaokutanika kumwabudu, Mungu hutaka wapate kufikiri juu ya thamani ya utunzaji na upendo Wake, ili wachangamshwe mioyo katika mambo yote ya maisha ya kila siku, ili wapate neema ya kufanya yote kwa haki na uaminifu.

Imetupasa kukusanyika karibu na msalaba. Kristo Ambaye Aliyesulibiwa anapaswa kuwa mada ya kutafakariwa sana, ya maongezi na hisia zetu za furaha zaidi. Imetupasa kukumbuka kila baraka tunayoipata mkononi mwa Mungu; na kama tunafahamu upendo Wake mkubwa usio na kifani, basi tukubali kumwekea amana mambo yetu yote, yule aliyesulibiwa kwa ajili yetu.

Moyo waweza kupaa karibu kabisa na mbingu katika mbawa za sifa. Huko mbinguni Mungu husujudiwa kwa nyimbo na shangwe. Nasi tunapomtolea Mungu shukrani zetu, tunamtukuza kama vile anavyotukuzwa na majeshi ya mbinguni, “Atoaye dhabihu za kushukuru, ndiye anayenitukuza.” Zabari 50:23. Hivyo tuje mbele za Muumbaji wetu “kwa kushukuru na sauti ya kuimba.” (Isaya 51:3) (*Jipatie Amani Moyoni, uk. 77, 88*).

Ikiwa mnamwita Mungu Baba yenu mnajitambua ninyi wenyewe kuwa watoto Wake mnaopaswa kuongozwa na hekima Yake na kuwa watiifu katika mambo yote, mkijua kuwa upendo Wake haubadiliki. Mtaukubali mpango Wake kwa ajili ya maisha yenu. Kama watoto wa Mungu, mtaitunza heshima Yake, tabia Yake, familia Yake, kazi Yake kama shabaha ya maslahi yenu ya juu. Itakuwa furaha yenu kutambua na kuheshimu uhusiano wenu na Baba na kwa kila mwanafamilia wa familia Yake. Mtafurahia kufanya kila jambo, hata liwe dogo, ambalo litaelekeza kwenye utukufu Wake au kwenye mafanikio ya ndugu zenu

(Thoughts from the Mount of Blessing, 105).